

每週經課朗誦經文(巴克禮台語漢字)2014/03/30

共同經課 - 1

撒母耳記上十六章一節~十三節

1 耶和華給撒母耳講：「我已經棄揀掃羅無互伊做以色列王，你為著伊憂悶欲到倦久啊？你著用角貯油滿滿，去啊，我欲差你去伯利恆人耶西選；因為我佇伊的子的中間，備辦一個王。」2 撒母耳講：「我怎樣通去？掃羅若聽見，伊欲劊我。」耶和華講：「你通帶一隻牛仔及你去，就講：『我來是欲祭獻耶和華。』」3 你著請耶西來赴此個祭祀，我欲指示你所應該行的事。我所指示你的人，你著替我給伊抹油。」4 撒母耳就照耶和華的話去行。到伯利恆，城裡許個長老攏愕愕出來迎接伊講：「你來是為著平安嗎？」5 伊講：「為著平安，我是欲祭獻耶和華。恁著清氣家己，來及我赴祭祀。」撒母耳就互耶西及伊許個子清氣，叫 in 來赴祭祀。6 in 已經來，撒母耳看見以利押，意思講，耶和華所欲抹油者果然佇伊的面前。7 總是耶和華給撒母耳講：「莫得看伊的容貌及伊身軀的大漢，此人是我所拒絕。因為耶和華的看無親像人啲看：人看外貌；耶和華是看心內。」8 耶西叫亞比拿達互伊對撒母耳的面前經過，撒母耳講：「耶和華也無揀此人。」9 耶西閣叫沙瑪經過，伊講：「耶和華也無揀此個。」10 耶西互伊許個子七個攏對撒母耳的面前經過，撒母耳給耶西講：「耶和華也無揀諸個。」11 撒母耳給耶西講：「你的子攏佇遮嗎？」伊應講：「猶有一個煞尾的，今啲飼羊。」撒母耳給耶西講：「你差人導伊來；因為伊猶未來，咱無欲坐桌，」12 就差人導伊入來。伊是赤色，目矚清秀，生做好看。耶和華講：「此人就是，你起來給伊抹油。」13 撒母耳就用角內的油，佇伊許個兄的中間抹伊。對彼日起，耶和華的神大大臨到大衛，撒母耳起身倒去拉瑪。

共同經課 - 2

詩篇二十三篇

1 [大衛的詩。] 耶和華是我的牧者，我無欠缺。2 伊互我倒佇青翠的草埔，導我佇安靜的水邊。3 伊互我的靈魂精英，為著伊的名導我行義的路。4 我雖然行過死蔭的山谷，亦毋驚災害，因為你及我佇啲；你的槌，你的枴，安慰我。5 佇我對敵的面前，你給我排設筵席；你用油抹我的頭殼，我的杯滿出來。6 恩典及慈悲的確隨我到一世；我欲永遠倚起佇耶和華的厝。

共同經課 - 3

以弗所書五章八節~十四節

8 因為恁前是暗，若是今恁佇主是光，著照光明的人來行。9 因為光的結子在佇一切的好及義及真。10 驗明甚麼是主所歡喜的。11 莫得參插佇黑暗無效果的行做，卡好著責備 in；12 因為 in 佇暗靜所行的，連講都見謫。13 獨獨凡事受責備的，就是互光所顯明，因為見若受顯明的攏是光。14 所以講：睏的人著醒，對死人中起來！就基督的光欲照你。

共同經課 - 4

約翰福音九章一節~四十一節

1 耶穌行過的時，看見一人出世就睛暝。2 伊的學生問伊講：「拉比，此人出世就睛暝，對是誰犯罪？是伊本身？抑是伊的父母啊？」3 耶穌應講：「此人無犯罪，伊的父母亦無，獨獨欲用伊來顯明上帝的所做。4 時猶是日時，咱著做差我者的工；暝時欲到，彼霎就無人會做工。5 我佇世間的時，是世間的光。」6 諸個話講了，就吓涎佇土腳，用涎攪土，用土糊睛暝人的目矚，7 給伊講：「去洗佇西羅亞的池（西羅亞翻譯就是奉差）。」伊就去洗，倒轉來已經會看見。8 伊的厝邊及平素看見伊做乞食的，講：「此人豈毋是坐啲來求乞的嗎？」9 有人講：「就是伊」；有人講：「毋是，是親像伊若定。」，伊家己講：「我就是。」10 in 就給伊講：「你的目矚怎樣得著開？」11 伊應講：「彼個名叫耶穌的，攪土糊我的目矚，給我講：『去西羅亞洗。』我隨時去洗，就得著看見。」12 in 就給伊講：「彼人佇叨落？」伊講：「我毋知。」13 in 導彼個平素睛暝的去見法利賽人。14 耶穌攪土來開伊的目矚的日是安息日。15 所以法利賽人亦問伊是怎樣得著看見。伊就給 in 講：「伊將土糜下佇我的目矚，我去洗，就看見。」16 法利賽人中有的講：「此人無守安息日，毋是對上帝來。」有的講：「有罪的人豈會行此號神蹟啊？」in 對按呢分旁。17 in 閣給睛暝人講：「伊已經開你的目矚，你講伊是甚麼號人？」伊講：「是先知人。」18 猶太人毋信伊平素睛暝，會閣看見，到叫得著看見者的父母來，19 就問 in 講：「此個是恁的子，就是恁所講出世睛暝的嗎？今伊怎樣會看見？」20 伊的父母應講：「伊是阮的子，出世睛暝，阮知。21 今伊怎樣得著看見，阮毋知；是誰開伊的目矚，阮亦毋知。伊大漢啦，問伊，伊欲家己講。」22 伊的父母講按呢，是因為驚猶太人；因為猶太人已經有定約，若有認耶穌做基督的，著革出會堂。23 所以伊的父母講：「伊大漢啦，通問伊。」24 in 就閣叫平素睛暝者，給伊講：「著歸榮光上帝，阮知此人是有人罪的人。」25 伊就應講：「伊是有罪的人抑毋是，我毋知；只有知一項，就是我前睛暝，現今會看見。」26 in 就給伊講：「伊給你做甚麼？按怎樣開你的目矚？」27 應講：「我已經給恁講，恁毋聽，啥事愛閣聽？豈是恁亦愛做伊的學生嗎？」28 in 就罵伊講：「你就是伊的學生；阮是摩西的學生。29 上帝有對摩西講話是阮所知；獨獨此人，阮毋知伊對叨落來！」30 彼人應講：「這就奇啦！伊開我的目矚，亦恁毋知伊對叨落來。31 咱知上帝無聽有罪的人，獨獨人若敬拜上帝，來行伊的旨意，伊就聽伊。32 對古早以來，未曾聽見出世睛暝者，有人開伊的目矚。33 此人若毋是對上帝來，就無所會做。」34 in 就應伊講：「你全然出世佇罪惡中，反轉教示阮嗎？」就革伊出。35 耶穌聽見 in 革伊出，後來尋著伊，就講：「你信上帝的子嗎？」36 伊應講：「主啊，伊是誰，互我信伊？」37 耶穌給伊講：「你曾看見伊，現在及你講話的就是。」38 伊就講：「主啊，我信！」就拜伊。39 耶穌講：「我因為審判臨到此世間，互袂看見的人，看見；也看見的人，變做睛暝。」40 及伊相及佇啲的法利賽人聽見諸個話，就給伊講：「總無阮亦睛暝嗎？」41 耶穌給 in 講：「恁若睛暝，就無罪；今恁講『阮看見』，就恁的罪定佇啲。」